

BERTSO BERRIAK

Julio Soto

Esnatzeari jarriak



GALDER IZAGIRRE/XDZ

I

Hiru urtaro pasa ostean
goxo-goxo lo tripotan
gaur bezalako bultzadarik ez
du sentitu gehiagotan
bata zuridun batek jarri du
bere amaren besotan
ingurukoek irripar eta
umea negar malkotan
agian beste pixka batean
segi nahiko zuen lotan.

II

Hogeita hamar urteko 'gazte'
batek gaua, dantzan, irriz...
beti beste bat eskatzen duen
zerbezaz, txupito gorritz...
etxera heldu da zerraila non
dagoen ezin igarriz
amak esnatu du bazkaltzeko
buruko minez, egarriz...
erabaki du parrandarik ez
duela egingo berriz.

III

Berrogeita bi urteko heldu
bat langabezian, larri
hamaiketatik ardi kontaktzen
eta gaur bezala sarri
buelta ta buelta, buelta ta buelta
lorik ezin erakarri
sabaia, bera, bera, sabaia
geldi, begira elkarri
egunsentiak egun berririk
ezingo dio ekarri.

IV

Gizon ezkondu baten bizio
errutinatuegiak
"Bai, bai, berandu iritsiko naiz".
Gezurak diren egiak
irripar gaizto bat erakutsi
du pareko aurpegiak
jolasaldia amaitu eta
lehertuta daude biak
bera ez den ohe batean
zabaldu ditu begiak.

V

Laurogeita bi urteko attun
bat ohean dagoela
kukurrukua entzun aurretik
bonbillak argitan gela
edalonztitik hortzak atera
ditu goizero bezela
baldarka jantzi ditu soinean
galtzak, atorra, txapela...
berak oraindik ez daki azken
esnatzea izan dela.

VI

Umore onez esna zaitzke,
mundua madarikatu
lehengo aldiz esna zaitzke,
hil kutxa batean sartu
adar pareaz esna zaitzke
edo ardiak kontatu
eta noizbait nahi bazenu mundu
hobe batean esnatu
segi ezazu amesten baina
lo egiten, lo ez hartu.



DOINUA: Itsasoari begira.



Bidali zure sortak bertsoak@argia.com helbidera. Aukeratuak orri honetan argitaratuko ditugu.